

佛說觀彌勒菩薩上 生兜率陀天經

刘宋居士沮渠京声译



南無本師釋迦牟尼佛

說明

本繁體校正版《佛說觀彌勒菩薩上生兜率陀天經》電子書，根據《乾隆大藏經》大乘五大部外重譯經，第 0200 部，劉宋居士沮渠京聲譯《佛說觀彌勒菩薩上生兜率陀天經》原藏影印本校正，句讀僅供參考。

本電子書是免費結緣品，特此說明。

仁慧草堂

二〇一八年十二月



掃碼關注仁慧草堂微信公眾號

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

淨口業真言

(三編)

唵. 修唎. 修唎. 摩訶修唎. 修修唎. 薩婆訶

淨三業真言

(三編)

唵. 娑嚩. 娑嚩秫馱. 娑嚩達摩娑嚩. 娑嚩秫度憾.

安土地真言

(三編)

南無三滿多. 母馱喃. 唵. 度嚕度嚕. 地尾. 娑婆訶

普供養真言

(三編)

唵. 誡誡曩. 三婆嚩. 禡日囉斛

南無本師釋迦牟尼佛 (合掌三稱)

開經偈

(一編)

無上甚深微妙法 百千萬劫難遭遇
我今見聞得受持 願解如來真實義

佛說觀彌勒菩薩上生 兜率陀天經¹

劉宋居士沮渠京聲譯²

如是我聞：

一時，佛在舍衛國·祇樹·給孤獨園。

爾時，世尊於初夜分，舉身放光，其光金色，繞祇陀園周遍七匝，照須達舍亦作金色，有金色光猶如段雲，遍舍衛國處處皆雨金色蓮華；其光明中，有無量百千諸大化佛，皆唱是言：「今於此中有千菩薩，最初成佛名拘留孫，最後成佛名曰樓至。」說是語已，尊者阿若憍陳如即從禪起，與其眷屬二百五十人俱；尊者摩訶迦葉與其眷屬二百五十人俱；尊者大目犍連與其眷屬二百五十人俱；尊者舍利弗與其眷屬二百五十人俱；摩訶波闍波提比丘尼與其眷屬千比丘尼俱；須達長者與三千優婆塞俱；毗舍佉母與二千優婆夷俱；復有菩薩摩訶薩，名跋陀婆羅，與其眷屬十六菩薩俱；文殊師利法王子與其眷屬五百菩薩俱；天、龍、夜叉、乾闥婆等一切大眾，覩佛光明皆悉雲

¹ 大正藏：佛說觀彌勒菩薩上生兜率天經

² 大正藏：宋居士沮渠京聲譯

集。

爾時，世尊出廣長舌相，放千光明，一一光明各有千色，一一色中有無量化佛，是諸化佛，異口同音，皆說清淨諸大菩薩甚深不可思議諸陀羅尼法，所謂阿難陀目佉陀羅尼、空慧陀羅尼、無閼³性陀羅尼、大解脫無相陀羅尼。

爾時，世尊以一音聲，說百億陀羅尼門。說此陀羅尼已，爾時，會中有一菩薩名曰彌勒，聞佛所說，應時即得百萬億陀羅尼門，即從座起整衣服，叉手合掌，住立佛前。

爾時，優波離亦從座起，頭面作禮而白佛言：「世尊！世尊往昔於毗尼中及諸經藏說阿逸多次當作佛，此阿逸多具凡夫身，未斷諸漏，此人命終當生何處？其人今者雖復出家，不修禪定，不斷煩惱，佛記此人，成佛無疑，此人命終，生何國土？」

佛告優波離：「諦聽！諦聽！善思念之。如來、應、正遍知今於此眾說彌勒菩薩摩訶薩阿耨多羅三藐三菩提記。此人從今十二年後命終，必得往生兜率⁴天上。爾時，兜率陀天上有五百億⁵天

³ 大正藏：礙

⁴ 大正藏：兜率陀；永樂北藏及龍藏：兜率

⁵ 大正藏：五百萬億；永樂北藏及龍藏：五百億

子，一一天子皆修甚深檀波羅蜜，為供養一生補處菩薩故，以天福力造作宮殿，各各脫身梅檀摩尼寶冠，長跪合掌，發是願言：『我今持是⁶無價寶珠及以天冠，為供養大心眾生故，此人來世不久，當成阿耨多羅三藐三菩提，我於彼佛莊嚴國界得受記者，令我寶冠化成供具。』如是諸天子等各各長跪，發弘誓願亦復如是。

「時，諸天子作是願已，是諸寶冠化作五百萬億寶宮，一一寶宮有七重垣，一一垣七寶所成，一一寶出五百億光明，一一光明中有五百億蓮華，一一蓮華化作五百億七寶行樹，一一樹葉有五百億寶色，一一寶色有五百億閻浮檀金光，一一閻浮檀金光中出五百億諸天寶女，一一寶女住立樹下，執百億寶無數瓔珞，出妙音樂，時樂音中演說不退轉地法輪之行。其樹生果如頗梨色，一切眾色入頗梨色中，是諸光明右旋宛⁷轉流出眾音，眾音演說大慈大悲法。一一垣牆高六十二由旬、厚十四由旬，五百億龍王圍繞此垣，一一龍王雨五百億七寶行樹，莊嚴垣上，自然有風吹動此樹，樹相振觸，演說苦、空、無常、無我、諸波羅蜜。

⁶ 大正藏：此

⁷ 大正藏：婉

「爾時，此宮有一大神，名牢度跋提，即從座起，遍禮十方佛，發弘誓願：『若我福德應為彌勒菩薩造善法堂，令我額上自然出珠。』既發願已，額上自然出百⁸億寶珠，瑠璃、頗梨一切眾色無不具足，如紫紺摩尼表裏映徹。此摩尼珠⁹迴旋空中，化為四十九重微妙寶宮，一一欄楯，萬億梵摩尼寶所共合成。諸欄楯間，自然化生九億天子、五百億天女，一一天子手中化生無量億萬七寶蓮華，一一蓮華上有無量億光，其光明中，具諸樂器，如是天樂不鼓自鳴，此聲出時，諸女自然執眾樂器，競起歌舞；所詠歌音，演說十善、四弘誓願，諸天聞者，皆發無上道心。

「時，諸垣¹⁰中有八色瑠璃渠，一一渠有五百億寶珠而用合成，一一渠中有八味水，八色具足。其水上湧，繞¹¹梁棟間，於四門外，化生四華，水出華中，如寶華流。一一華上有二十四天女，身色微妙如諸菩薩莊嚴身相，手中自然化五百億寶器，一一器中，天諸甘露自然盈滿，左肩荷佩無量瓔珞，右肩復負無量樂器，如雲住空從水而出，讚歎菩薩六波羅蜜；若有往生兜率天上，

⁸ 大正藏：五百；永樂北藏及龍藏：百

⁹ 大正藏：光

¹⁰ 大正藏：園

¹¹ 大正藏：游

自然得此天女侍御。亦有七寶大師子座，高四由旬，閻浮檀金、無量眾寶以為莊嚴，座四角頭生四蓮華，一一蓮華百寶所成，一一寶出百億光明，其光微妙，化為五百億眾寶雜華，莊嚴寶帳。

「時，十方面百千梵王，各各持一梵天妙寶，以為寶鈴，懸寶帳上。時，小梵王持天眾寶，以為羅網，彌覆帳上。爾時，百千無數天子、天女、眷屬，各持寶華，以布座上，是諸蓮華，自然皆出五百億寶女，手執白拂，侍立帳內。

「持宮四角有四寶柱，一一寶柱有百千樓閣，梵摩尼珠以為交¹²絡。時，諸閣間有百千天女，色妙無比，手執樂器，其樂音中演說苦、空、無常、無我、諸波羅蜜。如是天宮，有百億萬無量寶色，一一諸女亦同寶色。

「爾時，十方無量諸天命終，皆願生¹³兜率天宮。

「時，兜率天宮有五大神：

「第一大神名曰寶幢，身雨七寶散宮牆內，一一寶珠化成無量樂器，懸處空中不鼓自鳴，有無量音，適眾生意。第二大神名曰華德，身雨眾

¹² 大正藏：絞

¹³ 大正藏：往生；永樂北藏及龍藏：生

華，彌覆宮牆，化成華蓋。一一華蓋，百千幢幡以為導引。第三大神名曰香音，身毛孔中，雨出微妙海彼岸旃檀香，其香如雲，作百寶色，繞宮七匝。第四大神名曰喜樂，雨如意珠，一一寶珠自然住在幢幡之上，顯說無量歸佛、歸法、歸比丘僧，及說五戒、無量善法、諸波羅蜜，饒益勸助菩提音¹⁴者。第五大神名曰正音聲，身諸毛孔流出眾水，一一水上有五百億華，一一華上有二十五玉女，一一玉女身諸毛孔出一切音聲，勝天魔后所有音樂。」

佛告優波離：「此名兜率陀天十善報應勝妙福處。若我住世一小劫中，廣說一生補處菩薩報應及十善果者不能窮盡，今為汝等略而解說。」

佛告優波離：「若有比丘及一切大眾，不厭生死樂生天者、愛敬無上菩提心者、欲為彌勒作弟子者，當作是觀。作是觀者，應持五戒、八齋、具足戒，身心精進，不求斷結，修十善法，一一思惟兜率陀天上妙快樂，作是觀者名為正觀，若他觀者名為邪觀。」

爾時，優波離即從座起，整衣服，頭面作禮，白佛言：「世尊！兜率陀天上乃有如是極妙樂事，

¹⁴ 大正藏：意

今此大士何時於閻浮提沒，生於彼天？」

佛告優波離：「却後¹⁵十二年，二月十五日，於波羅捺國劫波利村波婆利大婆羅門家，本所¹⁶生處，結加趺坐，如入滅定，身紫金色，光明豔赫如百千日，上至兜率陀天，其身舍利如鑄金像，不動不搖，身圓光中，有首楞嚴三昧、般若波羅蜜字義炳然。時，諸天人¹⁷尋即為起眾寶妙塔，供養舍利。時，兜率陀天七寶臺內、摩尼殿上、師子床座，忽然化生，於蓮華上結加趺坐，身如閻浮檀金色，長十六由旬，三十二相、八十種好皆悉具足，頂上肉髻髮紺瑠璃色，釋迦毗楞伽摩尼、百千萬億甄叔迦寶以嚴天冠。其天寶冠有百萬億色，一一色中有無量百千化佛，諸化菩薩以為侍者；復有他方諸大菩薩，作十八變隨意自在住天冠中。彌勒眉間有白毫相光，流出眾光作百寶色，三十二相一一相中，五百¹⁸億寶色，一一好中¹⁹亦有五百億寶色，一一相好艷出八萬四千光明雲，與諸天子各坐華座，晝夜六時，常說不退轉地法輪之行；經一時中，成就五百億天子，

¹⁵ 大正藏：彌勒先於波羅捺國劫波利村波婆利大婆羅門家生，却後；永樂北藏及龍藏：却從；校勘：却後

¹⁶ 大正藏：還本；永樂北藏及龍藏：於波羅捺國劫波利村波婆利大婆羅門家，本所

¹⁷ 大正藏：人天；永樂北藏及龍藏：天人

¹⁸ 大正藏：有五百；永樂北藏及龍藏：五百

¹⁹ 大正藏：一一好；永樂北藏及龍藏：一一好中

令不退²⁰於阿耨多羅三藐三菩提。如是處兜率陀天，晝夜恒說此不退轉法輪²¹，度諸天子。閻浮提歲數五十六億萬歲，爾乃下生於閻浮提，如《彌勒下生經》說。」

佛告優波離：「是名彌勒菩薩於閻浮提沒生兜率陀天因緣。佛滅度後，我諸弟子，若有精勤修諸功德，威儀不缺，掃塔塗地，以眾名香妙華供養，行眾三昧，深入正受，讀誦經典，如是等人，應當至心，雖不斷結，如得六通，應當繫念，念佛形像，稱彌勒名。如是等輩，若一念頃受八戒齋，修諸淨業，發弘誓願，命終之後，譬如壯士屈申臂頃，即得往生兜率陀天，於蓮華上結加趺坐，百千天子作天妓樂，持天曼陀羅華、摩訶曼陀羅華，以散其上，讚言：『善哉！善哉！善男子！汝於閻浮提廣修福業來生此處，此處名兜率陀天，今此天主名曰彌勒，汝當歸依。』應聲即禮，禮已諦觀眉間白毫相光，即得超越九十億劫生死之罪。是時，菩薩隨其宿緣，為說妙法，令其堅固，不退轉於無上道心。如是等眾生，若淨諸業，行六事法，必定無疑當得生於兜率天上，

²⁰ 大正藏：不退轉；永樂北藏及龍藏：不退

²¹ 大正藏：說此法；永樂北藏及龍藏：說此不退轉法輪

值遇彌勒，亦隨彌勒下閻浮提，第一聞法，於未來世值遇賢劫一切諸佛，於星宿劫亦得值遇諸佛世尊，於諸佛前受菩提記。」

佛告優波離：「佛滅度後，比丘、比丘尼、優婆塞、優婆夷、天、龍、夜叉、乾闥婆、阿脩羅、迦樓羅、緊那羅、摩睺羅伽等，是諸大眾，若有得聞彌勒菩薩摩訶薩名者，聞已歡喜，恭敬禮拜，此人命終，如彈指頃即得往生，如前無異。但得聞是彌勒名者，命終亦不墮黑闇處、邊地、邪見、諸惡律儀，恒生正見，眷屬成就，不謗三寶。」

佛告優波離：「若善男子、善女人，犯諸禁戒，造眾惡業，聞是菩薩大悲名字，五體投地，誠心懺悔，是諸惡業速得清淨。未來世中，諸眾生等，聞是菩薩大悲名稱，造立形像，香華、衣服、繒蓋、幢幡、禮拜繫念，此人命欲終時，彌勒菩薩放眉間白毫大人相光，與諸天子雨曼陀羅華，來迎此人。此人須臾即得往生，值遇彌勒，頭面禮敬，未舉頭頃便得聞法，即於無上道得不退轉，於未來世得值恒河沙等諸佛如來。」

佛告優波離：「汝今諦聽，是彌勒菩薩，當

為²²未來世一切²³眾生，作大歸依處。若有歸依彌勒菩薩²⁴，當知是人於無上道得不退轉。彌勒菩薩成多陀阿伽度、阿羅訶、三藐三佛陀時，如此行人，見佛光明即得受²⁵記。」

佛告優波離：「佛滅度後，四部弟子、天、龍、鬼神，若有欲生兜率²⁶天者，當作是觀，繫念思惟，念兜率陀天，持佛禁戒，一日至七日，思念十善，行十善道，以此功德迴向願生彌勒前者，當作是觀。作是觀者，若見一天人、坐²⁷一蓮華，若一念頃稱彌勒名，此人除却千二百劫生死之罪；但聞彌勒名合掌恭敬，此人除却五十劫生死之罪；若有禮敬²⁸彌勒者，除却百億劫生死之罪；設不生天，未來世中，龍華菩提樹下亦得值遇，發無上道心²⁹。」

說是語時，無量大眾即從坐起，頂禮佛足，禮彌勒足，繞佛及彌勒菩薩百千匝。未得道者各發誓願：「我等天人八部，今於佛前發誠實誓願，於未來世值遇彌勒，捨此身已，皆得上生兜率陀

²² 大正藏：於；永樂北藏及龍藏：當為

²³ 大正藏：當為；永樂北藏及龍藏：一切

²⁴ 大正藏：菩薩者；永樂北藏及龍藏：菩薩

²⁵ 大正藏：授

²⁶ 大正藏：兜率陀；永樂北藏及龍藏：兜率

²⁷ 大正藏：見

²⁸ 大正藏：敬禮；永樂北藏及龍藏：禮敬

²⁹ 大正藏：心；永樂北藏及龍藏：道心

天。」

世尊記曰：「汝等及未來世修福持戒，皆當往生彌勒菩薩前，為彌勒菩薩之所攝受。」

佛告優波離：「作是觀者名為正觀，若他觀者名為邪觀。」

爾時，尊者阿難即從座起，叉手長跪白佛言：「世尊！善哉！世尊！快說彌勒所有功德，亦記未來世修福眾生所得果報，我今隨喜。唯然，世尊！此法之要云何受持？當何名此經？」

佛告阿難：「汝持佛語，慎勿忘失，為未來世，開生天路，示菩提相，莫斷佛種。此經名『彌勒菩薩般涅槃』，亦名『觀彌勒菩薩上生³⁰兜率陀天勸發菩提心』，如是受持。」

佛說是語時，他方來會十萬菩薩，得首楞嚴三昧；八萬億諸天，發菩提心；皆願隨從彌勒下生。

佛說是語時，四部弟子、天龍八部，聞佛所說，皆大歡喜，禮佛而退。

佛說觀彌勒菩薩上生兜率陀天經

³⁰ 大正藏：生；永樂北藏及龍藏：上生

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

補闕圓滿真言

(三編)

唵. 呼嚧呼嚧. 社曳穆契. 莎訶

普回向真言

(三編)

唵. 娑麼囉. 娑麼囉. 弭麼曩. 薩嚩訶. 摩訶斫迦囉
嚩吽

南無佛 南無法 南無僧 (合掌三稱)

南無本師釋迦牟尼佛 (合掌三稱)

南無當來下生彌勒佛 (合掌三稱)

南無護法諸天菩薩 (合掌三稱)

禮佛發願文

(一編)

歸命十方調御師 演揚清淨微妙法

三乘四果解脫僧 願賜慈悲哀攝受

但(某甲)自違真性，枉入迷流。隨生死以飄沉，逐色聲而貪染。十纏十使，積成有漏之因；六根六塵，妄作無邊之罪。迷淪苦海，深溺邪途。著我耽人，舉枉措直。累生業障，一切愆尤。仰三寶以慈悲，瀝一心而懺悔。

所願能仁拯拔，善友提攜。出煩惱之深源，到菩提之彼岸。此世福基命位，各願昌隆；來生智種靈苗，同希增秀。生逢中國，長遇明師。正信出家，童真入道。六根通利，三業純和。不染世緣，常修梵行。執持禁戒，塵業不侵。嚴護威儀，蝸飛無損。不逢八難，不缺四緣。般若智以現前，菩提心而不退。修習正法，了悟大乘。開六度之行門，越三祇之劫海。建法幢於處處，破疑網於重重。降伏眾魔，紹隆三寶。承事十方諸佛，無有疲勞。修學一切法門，悉皆通達。廣作福慧，普利塵沙。得六種之神通，圓一生之佛果。然後不捨法界，遍入塵勞。等觀音之慈心，行普

賢之願海。他方此界，逐類隨形。應現色身，演揚妙法。泥犁苦趣，餓鬼道中，或放大光明，或現諸神變，其有見我相，乃至聞我名，皆發菩提心，永出輪迴苦。火鑊冰河之地，變作香林；飲銅食鐵之徒，化生淨土。披毛戴角，負債含怨，盡罷辛酸，咸霑利樂。疾疫世而現為藥草，救療沉痾；饑饉時而化作稻粱，濟諸貧餒。但有利益，無不興崇。次期累世冤親，現存眷屬，出四生之汨沒，捨萬劫之愛纏。等與含生，齊成佛道。虛空有盡，我願無窮。情與無情，同圓種智。

迴向偈

(一編)

願以此功德 普及於一切
我等與眾生 皆共成佛道

三皈依

(一編)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；
自皈依僧，當願眾生，統理大眾，一切無礙。和南聖眾。

南无护法韦驮尊天菩萨



此咒置經書中可滅誤跨之罪